

Johresbericht 2015

GV vom 16. März 2016

Gschwelltiobe

Met em traditionell Gschwelltiobe si mer am 27. März, wie emmer, is neue Vereinsjahr gstartet. 23 Froue hei sech dä gmüetlich Obe im Restaurant Chrüz ned lo entgo.

Kreativkurs Geschenke verpacken

Leider het dr Kreativkurs zom Gschänkli originell z verpacke zwenig Aklang gfonge ond müesse abgseit wärde.

Foto OL (Schweiz bewegt)

Dr Foto OL durs Dorf alässiglich vo dr Schwiiz bewegt Woche esch bi Jung ond Aut uf grosses Inträsse gstosse ond es hei vöu Lüüt die gsuechte Statione bsuecht ond so Zyt für Schwiiz bewegt gsamlet. Die eint oder andere hei Wägchrüz gsuecht, wo si vorhär no nie gachtet hei...

Maiandacht

D Maiandacht het am 29. Mai stattgfonde. Nach de letste Jahr uswärts, hei 20 Froue weder mou euses neu renovierte Kappelleli im Dorf bsuecht för d Adacht. Nachhär hei mer dr Obe no gmüetlich im Cafi Werd met indischem Buffet oder sösch öppis Feinem lo usklinge.

Gmeinsame Gottesdienst

Am 17. Juni het bi eus dr gmeinsam Gottesdienst stattgfonde. Aschliesend hets no Kafi ond Zöpfe gäh.

Besuch Fernsehsendung Aeschbacher

Ändlich dr Aeschbi mou live z erläbe...das esch dr Wonsch vo 63 Froue gse, wo am 18. Juni met em Car uf Züri gfahre si. Es het chli Gedoud bruucht, bes aui i däm, ned sehr grosse, Studio es Plätzli gfonde hei. D Ufzeichnig zom Thema „Liebe ist...“ esch de sehr spannend ond idrücklich gse ond die eint oder andere hei e Woche spöter ned schlächt gstunet, wie prominent me se im Fernseh gseh het. Es paar Froue vo Oberbuchsiten hei eus bi däm Bsuech ou no begleitet.

Minigolf

S Minigolfturnier vom 5. August esch vo 6 Froue bsuecht worde. Trotz däm chliine Grüppeli eschs e lustige Obe gse.

Vereinsreise Kaltbachkäse

D Vereinsreis het letsts Johr 26 Interessierti am 18. September id Kaltbachkäserei gfuehrt. Nachdäm mer eus aui i hygienisch korrekti Überkleider hei müesse stürze, si mer i die spannendi Materie vom höhlegriifte Chääs gfuehrt worde. Es esch sehr idrücklich gse, was sech i dere Höhli aues verbirgt ond abspöüt. Nach dere interessante Fuehrig ond ere chliine Degustation, hei mer, weder i normaler Bekleidig, dörfe es feins Fondue gniesse ond eus im Lade no met Kaltbachkäs idecke. Ufem Heiwäg si mer de z Reide no go es Dessert ässe.

Gedächtnisgottesdienst

Dr Gedächtnisgottedienst het am 4. Novämber stattgfonde. Mer hei derbi drüüne verstorbene Metglederinne gedänkt.

Wiehnachtsmäret

Dr Wiehnachtsmäret hätt eus am 20. November uf Colmar gfuehrt...nach de schreckliche Gschehnis vo Paris, de entsprächende ufwändige Grenzkontrollene met lange Wartezyte ond vorauem wägem agseite Sturm ond Duurräge, hei mer dr Usflug uf Colmar schweren Herzens müesse absäge. Eg danke, dass die eint oder anderi schlussändlich

doch ned onglücklich gse esch, dass se der Obe i dr warme Stube het chöne verbringe...

Mer wärde das Johr uf au Fäu no einisch e Alauf näh ond hoffe, mer wärde de met prächtigem Wiehnachtsmäret Wätter honoriert...

Adventsfeier

För d Adventsfyr si am 10. Dezember 15 Froue im Panoramasääli zäm-echo. D Bea Emmenegger het e Gschecht verzöut ond Lieder met eus gsonge. Es esch e gmüetliche, stimmigsvolle Obe gse.

Weltgebetstag

Vor 12 Tag, am 4. März het dr Wäutgebätstag bi eus z Neuedorf stattg-fonde. Är esch das Johr vo Froue vo Cuba vorbereitet worde. Nach em Gottesdienst hets no Kafi ond Zöpfe gäh.

Jass-Spiel-Jokerrunde

Wie au Johr, hei sech einisch im Monet d Froue zor Jass-Spiel ond Jo-kerrundi troffe!

Geburtstage

Im Johr 2015 hei mer vom Vorstand 2x zom 70., 4x75., 1x85. ond 1x90. Geburtstag dörfe go gratuliere!

Hochzeit

Am 29. August hei mer im Tanja ond Björn Blenke dörfe zom Jo- Wort go gratuliere!

Nachwuchs

Nachwuchs hei 5 Familie becho:

14. Juli	Lennox	von Claudia Oppliger
31. Aug.	Leon	von Nicole Flury
06. Jan.	Jorin	von Elke Ramseier
20. Jan.	Nevio	von Karin Hopf
06. März	Nevin	von Coni Muzzarelli

Wie der gsäiht, goht das Vereinsjohr ned id Liste met potentielle Frouegmeinschaftsmitglieder i! :o)

Vorstandssitzige

Mer vom Vorstand hei eus zo 4 Sitzige troffe.

Ou s 2015 esch weder es interessants, vöusitigs Vereinsjohr gse ond eg möchts a dere Stöu ned ongerlo ganz hätzlich danke z säge.

E spezielle ond ganz hätzliche Dank recht eg a mini Vorstandskolleginne ond d Froue vo der Untergruppe...met vöu Isatz ond Hätzbluet häufe se aui i eusem Verein met...es esch eifach ned säubstverständlich, dass me sovöu vo sinere Freizeit för ne ehreamtliche Tätigkeit isetzt...eg weiss das wörkli z schätze...ganz hätzliche Dank!

Ou dr Bea Emmengegger möcht eg a dere Stöu danke för ehre Isatz ond d Inputs.

Euch aune dank eg förs Vertroue, dass der eusi Aläss bsuechet ond so s Inträsse a eusem Verein zeigt.